

*Sarajevo, 17.12.2015. godine
Broj: 945/15*

**ZAPISNIK I ZAKLJUČCI SA DESETE SJEDNICE
PREDSJEDNIŠTVA SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

U Gradskoj upravi Grada Sarajeva je dana 17.12.2015. godine održana Deseta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza su prisustvovali:

1. Edin Smajić, načelnik Općine Vogošća;
2. Emir Bubalo, načelnik Općine Konjic;
3. Nedžad Koldžo, načelnik Općine Novo Sarajevo;
4. Muhamed Ramović, načelnik Općine Goražde;
5. Amila Koso, po ovlaštenju načelnice Općine Visoko;
6. Kristijan Petrović, po ovlaštenju načelnika Općine Tomislavgrad;
7. Mario Rozić, po ovlaštenju načelnika Općine Čitluk.

Pored gore navedenih, sjednici su prisustvovali i: Miljenko Jelić, savjetnik federalnog ministra pravde, Danica Cigelj, pomoćnica ministra u Federalnom ministarstvu poljoprivrede, vodoprivrede i šumarstva, Admir Hadžiemrić, načelnik Općine Travnik i predsjednik Nadzornog odbora Saveza, Majda Ganibegović, UNDP, projekt-menadžer na projektu „Jačanje uloge mjesnih zajednica u Bosni i Hercegovini“, Merisa Kaljanac, pomoćnik načelnika Općine Olovo, Mila Eminović, savjetnica gradonačelnika Grada Sarajeva za pravna pitanja, Nermina Suljagić, Grad Sarajevo, Vesna Travljanin, direktor Saveza, Zlata Turkić, viši saradnik za rad sa skupštinskim komisijama i institucijama vlasti, Dženita Kovačević, Savez i Selma Fišek, viši saradnik za pravna pitanja.

Vesna Travljanin je pozdravila sve prisutne.

Mario Rozić je izvijestio članove Predsjedništva da prisustvuje sjednici u ime predsjednika Predsjedništva Saveza Ive Jerkića koji je, iz zdravstvenih razloga, spriječen da prisustvuje današnjoj sjednici Predsjedništva.

Vesna Travljanin naglašava da je sa predsjednikom Ivom Jerkićem dogovorila da umjesto njega sjednicom predsjedava Edin Smajić.

Mila Eminović je pozdravila prisutne i prenijela pozdrave u ime Grada Sarajeva i gradonačelnika Ive Komšića koji je bio spriječen da prisustvuje sjednici. Takođe je istakla da je Mira Grgić, predsjednica Komisije za lokalnu samoupravu u Predstavničkom domu Parlamenta Federacije BiH, kojoj je upućen poziv za sjednicu Predsjedništva, zbog zdravstvenih razloga spriječena da prisustvuje istoj, te da će prisustvovati narednoj sjednici Predsjedništva Saveza.

Edin Smajić je pozdravio sve prisutne i otvorio Desetu sjednicu Predsjedništva Saveza. Predložio je dnevni red sjednice kako slijedi s tim da se pod tačku 2. uvrsti tačka 4. b), te da tačka 3. d) postane tačka 3. a):

1. Zapisnik i Zaključci sa Devete sjednice Predsjedništva Skupštine Saveza općina i gradova Federacije BiH
2. Zapisnici sa sjednica komisija Saveza
 - a) Komisija za ustavna i zakonodavna pitanja
Izjavitelj: Zlata Turkić, viši saradnik za rad sa skupštinskim komisijama i institucijama vlasti
 - b) Komisija za ekonomski razvoj općina i gradova i finansije
Izjavitelj: Zlata Turkić, viši saradnik za rad sa skupštinskim komisijama i institucijama vlasti
 - c) Komisija za imovinska pitanja, prostorno uređenje, stambeno-komunalne djelatnosti i zaštitu životnog okoliša
Izjavitelj: Zlata Turkić, viši saradnik za rad sa skupštinskim komisijama i institucijama vlasti
3. Projektne aktivnosti Saveza
 - a) Nacrt Strategije obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine za period 2016. - 2020. godina
Izjavitelj: Edin Demirović, saradnik za lokalnu samoupravu
 - b) Informacija o realizovanim aktivnostima Saveza u okviru Projekta „Jačanje lokalne demokratije“ – LOD IV
Izjavitelj: Edin Demirović, saradnik za lokalnu samoupravu
 - c) Informacija o realizovanim aktivnostima Saveza u okviru Projekta „Integrirani lokalni razvoj“ – ILDP
Izjavitelj: Zlata Turkić, viši saradnik za rad sa skupštinskim komisijama i institucijama vlasti

d) Projekat „Jačanje uloge mjesnih zajednica u Bosni i Hercegovini“
Izvjestilac: predstavnik UNDP-a

4. Informacije:

a) Odgovor Kantonalnog suda u Sarajevu na Urgenciju Saveza općina i gradova Federacije BiH po osnovu tužbe Saveza protiv Federacije Bosne i Hercegovine u vezi sa otplatom kreditnih sredstava prema Međunarodnom monetarnom fondu

Izvjestilac: Vesna Travljanin, direktor Saveza

b) Informacija o zakonodavnim aktivnostima Saveza

Izvjestilac: Selma Fišek, viši saradnik za pravna pitanja

c) Konferencija predsjedavajućih i sekretara općinskih/gradskih vijeća

Izvjestilac: Amir Kupusija, viši saradnik za informisanje i odnose s javnošću

d) Konferencija pomoćnika načelnika za finansije

Izvjestilac: Zlata Turkić, viši saradnik za rad sa skupštinskim komisijama i institucijama vlasti

5. Tekuća pitanja

a) Odgovor Federalnog ministarstva pravde na Inicijativu Saveza za donošenje Zakona o komunalnim djelatnostima u Federaciji Bosne i Hercegovine

Predsjedništvo Saveza je jednoglasno usvojilo predloženi dnevni red.

1. Zapisnik i Zaključci sa Devete sjednice Predsjedništva Skupštine Saveza općina i gradova Federacije BiH

Edin Smajić je otvorio raspravu, te je dao na glasanje Zapisnik i zaključke sa Devete sjednice Predsjedništva Skupštine Saveza općina i gradova Federacije BiH

Predsjedništvo Saveza je jednoglasno usvojilo Zapisnik i zaključke sa Devete sjednice Predsjedništva Skupštine Saveza općina i gradova Federacije BiH.

2. Zapisnici sa sjednica komisija Saveza

a) Komisija za ustavna i zakonodavna pitanja

Zlata Turkić je informisala članove Predsjedništva Saveza o inicijativama sa sjednice Komisije za ustavna i zakonodavna pitanja.

Predsjedništvo Saveza je jednoglasno usvojilo Zabilješku sa sjednice Komisije za ustavna i zakonodavna pitanja sa zaključcima kako slijedi:

- Inicijativa Grada Tuzla za izmjene Zakona o stvarnim pravima ocijenjena je opravdanom i Komisija je podržava, izuzev u dijelu koji se odnosi na:
 - prenos vlasništva (potrebno je sačekati donošenje Zakona o državnoj imovini, Zakona o javnim dobrima, popis imovine i upis u registre nekretnina);
 - dodjelu zemljišta bez naknade (dovođenje u neravnopravan položaj građana istih kategorija koji su ranije ostvarili ista prava); i
 - sklapanje ugovora neposrednom nagodbom (isto je opravdano samo u slučaju neuspješno provedenih javnih natječaja).
- Anketirati sve jedinice lokalne samouprave u Federaciji BiH o primjeni Zakona o stvarnim pravima sa molbom da Savezu pošalju eventualne primjedbe i prijedloge za izmjenu istog;
- Komisija predlaže Predsjedništvu da podrži Javnu politiku "Radno iskustvo-svima" kao osnovu za donošenje izmjene propisa kojim će se stvoriti veće pretpostavke i omogućiti većem broju volontera za sticanje prvog radnog iskustva, pod uslovom da se teret izmjene propisa odnosi na sve pravne subjekte linearno (BiH, Federacija BiH, kantoni, općine/gradovi, javne ustanove, javna preduzeća i privredni subjekti);
- Komisija u potpunosti podržava Inicijativu Udruženja građana „Budućnost“ za poboljšanje investiranja za djecu;
- Predsjedništvo Saveza je zaključilo da Komisija za izbor i imenovanja predloži kandidata u Radnu grupu Udruženja građana „Budućnost“ za poboljšanje investiranja za djecu o kojem će se Predsjedništvo izjasniti na narednoj sjednici, a koji će prisustvovati okruglim stolovima na temu poboljšanja investiranja za djecu u organizaciji Udruženja građana „Budućnost“.

Mario Rozić je postavio pitanje Miljenku Jeliću u vezi sa donošenjem Zakon o državnoj imovini.

Miljenko Jelić je istakao da Federalno ministarstvo pravde ima u vidu to pitanje, te da su zaprimili gore navedene inicijative i da postupaju po njima.

Edin Smajić je naglasio da se za jednog volontera treba izdvojiti nešto više od 700,00 KM mjesečno, a da je to opet volonterski a ne pripravnički rad.

Muhamed Ramović je istakao da Općina Goražde trenutno ima 32 volontera, i da im plaćaju topli obrok i prevoz.

Edin Smajić navodi da su Zakonom o volontiranju propisana drugačija davanja za volontere. Dodao je da bi se Savez, na nekoj od sljedećih sjednica Predsjedništva, trebao ozbiljnije pozabaviti ovim pitanjem.

b) Komisija za ekonomski razvoj općina i gradova i finansije

Zlata Turkić ukratko izvještava o zaključcima sa sjednice Komisije za ekonomski razvoj općina i gradova i finansije.

Predsjedništvo Saveza je jednoglasno usvojilo Zabilješku sa sjednice Komisije za ekonomski razvoj općina i gradova i finansije sa zaključcima kako slijedi:

- Prihvata se Inicijativa Općinskog vijeća Ilidža **o preispitivanju člana 1. Pravilnika o izmjenama i dopunama Pravilnika o naknadama za korištenje cestovnog zemljišta kojim su vlasnici instalacija oslobođeni plaćanja naknada u pojasu cesta i to iz razloga što je isti u suprotnosti sa članom 61. stav 5. Zakona o cestama Federacije BiH kojim je propisano da je za korištenje cestovnog zemljišta investitor dužan plaćati naknadu ;**
- Zaključak i Inicijativu uputiti Ministarstvu prometa i komunikacija Federacije BiH.

Predsjedništvo Saveza je takođe usvojilo zaključak da Stručna služba Saveza anketira jedinice lokalne samouprave po pitanju postojanja sudskih presuda vezanih za putne naknade i da dobijene informacije putem e-maila dostavi svim jedinicama lokalne samouprave u Federaciji BiH.

c) Komisija za imovinska pitanja, prostorno uređenje, stambeno-komunalne djelatnosti i zaštitu životnog okoliša

Zlata Turkić izvještava o zaključcima sa Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša.

Predsjedništvo Saveza je jednoglasno usvojilo Zabilješku sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša sa zaključcima kako slijedi:

- Prihvata se Nacrt zakona o korištenju, upravljanju i održavanju zajedničkih dijelova i uređaja zgrade kao dobra osnova za izradu Prijedloga zakona;
- U Prijedlog zakona obavezno uključiti primjedbe Općine Kakanj (dostavljene Savezu), kao i ostale primjedbe jedinica lokalne samouprave sa područja Zeničko-dobojskog kantona koje su, eventualno, dostavljene direktno Ministarstvu.

d) Informacija sa održane Konferencije pomoćnika načelnika za finansije

Edin Smajić je naglasio da je on član Predsjedništva Saveza ispred općina Kantona Sarajevo i istakao da u materijalima sa konferencije nije zabilježena kategorija „porez na dohodak“. Naglasio je da Općina Vogošća po kriteriju broja stanovnika ima smanjenu dobit, te da se nađu u situaciji kada im dođe revizija i insistira na fiskalnoj odgovornosti. Dodao je da gradske općine nemaju taj problem jer imaju velike prihode.

Miljenko Jelić je istakao da je ovo vrlo složeno pitanje.

Emir Bubalo je naveo da su Zakonom o porezu na dodanu vrijednost definisani procenti i da se nakon deset godina ti procenti za općine nisu povećali.

Nedžad Koldžo je napomenuo da jedinice lokalne samouprave imaju obavezu vraćanja vanjskog duga za koji se nisu zadužile.

Edin Smajić je dao riječ Dženiti Kovačević da izvijesti članove Predsjedništva Saveza o zaključcima sa održane Konferencije pomoćnika načelnika za finansije.

Dženita Kovačević je naglasila da su povod za ovu Konferenciju bili zaključci oba doma Parlamenta Federacije BiH u skladu sa kojima je potrebno pristupiti izradi novog Zakona o pripadnosti javnih prihoda u Federaciji Bosne i Hercegovine. Istakla je da se prošlo kroz prijedloge Saveza za izmjene navedenog Zakona iz 2012. godine, te da je traženo od Federalnog ministarstva finansija da se formira radna grupa za izradu Zakona, jer nije u redu donositi jedan tako važan zakonski propis u roku od 90 dana kako je navedeno u dopisu Federalnog ministarstva finansija upućenog Savezu. Dženita Kovačević je navela pojedinačne zaključke sa Konferencije pomoćnika načelnika za finansije.

Emir Bubalo je istakao da Općini Konjic predstavlja problem to što se samo 5% od raspodjele indirektnih poreza dodjeljuje po kriteriju koji se odnosi na površinu jedinice lokalne samouprave.

Predsjedništvo Saveza je usvojilo zaključke kako slijedi:

1. Jasno definirati i obuhvatiti sve nadležnosti koje su jedinice lokalne samouprave dužne finansirati, kao i sve nadležnosti koje su drugi nivoi vlasti

- dužni finansirati. U slučaju prenosa nadležnosti, jasno definirati i mehanizam prenosa izvora prihoda za finansiranje istih;
2. Jasno definirati sve javne prihode i jasno odrediti njihovo izuzimanje iz obaveze plaćanja PDV-a;
 3. Povećati postotak udjela od prihoda sa Jedinstvenog računa sa 8,42% na 12% jedinicama lokalne samouprave;
 4. Povećati postotak od poreza na dohodak koji pripada jedinicama lokalne samouprave na najmanje 50% (i u općinama Kantona Sarajevo) – ovaj Zaključak je usvojen sa jednim glasom „protiv“;
 5. Raspodijeliti 10% od poreza na dobit jedinicama lokalne samouprave;
 6. Kao relevantne statističke podatke prilikom raspodjele prihoda koristiti podatke iz evidencije Agencije za identifikacione isprave/dokumente, evidenciju i razmjenu podataka BiH do objave zvaničnih rezultata popisa stanovništva;
 7. Izuzeti jedinice lokalne samouprave iz otplate vanjskog duga Federacije BiH;
 8. Tražiti povećanje pondera za Općinu Trnovo na 2,2 i za Općinu Vogošća na 1,8;
 9. Federalnom ministarstvu finansija dostaviti tekst Zakona o finansiranju jedinica lokalne samouprave u Federaciji Bosne i Hercegovine koji je pripremio Savez uz zahtjev da se isti usvaja zajedno sa novim Zakonom o pripadnosti javnih prihoda u Federaciji Bosne i Hercegovine.

Predsjedništvo Saveza je usvojilo zaključak da se Komisija za ekonomski razvoj općina i gradova i finansije izjasni o navedenim zaključcima sa Konferencije pomoćnika načelnika za finansije.

4. b) Zakonodavne aktivnosti Saveza:

Zakon o šumama

Edin Smajić je napomenuo da je Savez bio uključen u izradu Zakona o šumama koji je usvojen na Predstavničkom domu Parlamenta Federacije BiH, ali nikad nije došao na dnevni red Doma naroda.

Emir Bubalo je izrazio svoje nezadovoljstvo aktivnostima vezanim za Zakon o šumama.

Vesna Travljanin je podsjetila članove Predsjedništva na zaključak sa prethodne sjednice Predsjedništva Saveza da se na današnju sjednicu pozove Džemal

Memagić, predstavnik Saveza u Radnoj grupi za izradu novog Zakona o šumama, predstavnik Federalnog ministarstva poljoprivrede, vodoprivrede i šumarstva, predsjednik Komisije za lokalnu samoupravu u Predstavničkom domu Parlamenta Federacije BiH i predsjednik Odbora za pravdu, opću upravu i lokalnu samoupravu u Domu naroda Parlamenta Federacije BiH.

Danica Cigelj je podsjetila na zaključak Vlade Federacije BiH kojim je formirana Radna grupa za izradu Prednacrt zakona o šumama koji je prosljeđen svim zainteresiranim stranama. Istakla je da je na isti upućen jako veliki broj primjedbi, čak oko hiljadu, da su primjedbe razmotrene i neke od njih i usvojene. Naglasila je da je u izradu novog Zakona o šumama uključena struka, te da se čeka odobrenje od premijera da se tekst zakona ponovo stavi na web stranicu Federalnog ministarstva poljoprivrede, vodoprivrede i šumarstva. Dodala je da je niz opravdanih primjedbi na Prednacrt zakona prihvaćen, i da je Savez dostavio svoje primjedbe koje su razmotrene od strane Ministarstva, kao i da su prihvaćene one koju su ocijenjene opravdanim.

Merisa Kaljanac je istakla da prisustvuje sjednici Predsjedništva Saveza po ovlaštenju i u ime Džemala Memagića, predstavnika Saveza u Radnoj grupi za izradu Zakona o šumama. Naglašava da ne bi pojedinačno navodila stavove vezane za Zakon o šumama koje u ime Saveza zastupa Džemal Memagić u radnoj grupi za izradu zakona, te da su oni dostupni u pismenoj formi.

Emir Bubalo je postavio pitanje u vezi sa Zakonom o šumama koji se već nalazi u parlamentarnoj proceduri, te izrazio neslaganje sa izradom novog zakona, za koji smatra da neće biti usvojen jer je protivustavan.

Danica Cigelj je navela da ni taj zakon neće proći, jer da je mogao proći, već bi bio usvojen. Istakla je da je to pitanje koje treba postaviti Vladi Federacije BiH i Parlamentu Federacije BiH.

Predsjedništvo Saveza je primilo k znanju ove informacije.

3. Projektne aktivnosti Saveza

a) Projekat „Jačanje uloge mjesnih zajednica u Bosni i Hercegovini“

Majda Ganibegović je istakla da ovaj Projekat predstavlja zajedničku inicijativu Vlade Švedske i Vlade Švicarske, i da je cilj projekta jačanje uloge mjesnih zajednica u Bosni i Hercegovini. Navela je da budžet projekta iznosi 8 miliona švicarskih franaka. Dodaje da bi implementacija projekta trebala rezultirati jačanjem građanskog aktivizma i povećanjem kvaliteta života za 300. 000 ljudi. Naglasila je da je objavljen Javni poziv za prijave na projekat u koji će biti uključeno 10 jedinica lokalne samouprave i 60 mjesnih zajednica, te da će naknadno biti uključeno još 10 jedinica lokalne samouprave. Istakla je da je predviđeno trajanje projekta 10 godina, te da još nije izvršena selekcija jedinica

lokalne samouprave koje su se prijavile za učešće na projektu i da bi u mjesecu januaru 2016. godine trebali biti poznati ti podaci.

Nedžad Koldžo je postavio pitanje o tome šta predstavlja stvarni cilj projekta. Istakao je da već postoji pet nivoa vlasti i da bi se na ovaj način uveo i šesti nivo. Naglasio da se mi ne možemo upoređivati sa Švedskom i Švicarskom i da bi ovakav projekat napravio još veći problem u našem društvu. Naglasio je da već postoji dobra saradnja između općina i mjesnih zajednica, te da smatra da nije vrijeme za ovakav projekat u ovom trenutku, a da je ideja dobra.

Mario Rozić je naglasio da se slaže sa Nedžadom Koldžom u cjelosti, ali da to nije projekat UNDP-a. Postavio je pitanje da li je Javni poziv zatvoren.

Majda Ganibegović odgovara da je Javni poziv zatvoren i da su na isti aplicirale 64 jedinice lokalne samouprave. Naglasila je da svrha projekta nije decentralizacija, nego poboljšanje kvaliteta javnih usluga.

Admir Hadžiemrić se uključio u diskusiju i naglasio da je UNDP dobio sredstva za implementaciju projekta i da će ga svakako implementirati.

Edin Smajić je konstatovao da se Savez ovdje ne pita mnogo, te da smo tu ako budemo mogli nešto pomoći.

Predsjedništvo Saveza je primilo k znanju informaciju o Projektu „Jačanje uloge mjesnih zajednica u Bosni i Hercegovini“

b) Nacrt Strategije obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine za period 2016. – 2020. godina

Selma Fišek je ukratko izvijestila članove Predsjedništva o aktivnostima na izradi Nacrta Strategije obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine za period 2016. – 2020. godina, te naglasila da je Savez imao dva predstavnika u Radnoj grupi za izradu Strategije. Napomenula je da je tekst Strategije dostavljen u materijalima za sjednicu, te da je potrebno, ukoliko Predsjedništvo Saveza podrži tekst Nacrta Strategije, da Savez i Agencija za državnu službu Federacije BiH zajednički upute Strategiju Vladi Federacije BiH na usvajanje.

Nedžad Koldžo je istakao da nije ista situacija od prije godinu dana i sada kada imamo novi Zakon o državnoj službi. Naglasio je da Savez prvenstveno treba insistirati na tome da se usvoji Zakon o zaposlenicima u organima jedinica lokalne samouprave u Federaciji Bosne i Hercegovine koji je pripremila radna grupa Saveza.

Edin Smajić je naveo da je ovo nešto sa čim smo već upoznati, te ističe da se rješenja predviđena Strategijom obuke mogu podržati. Naglasio je da je veoma važno pitanje o kojem govori Nedžad Koldžo, ali da je to potpuno nova oblast i da to treba imati u vidu i o tome razgovarati, jer će izmjenama i dopunama Zakona o državnoj službi u Federaciji Bosne i Hercegovine načelnici biti dovedeni u nepovoljnu situaciju u smislu da će njihovi pomoćnici biti birani na mandat što ne smatraju dobrim rješenjem.

Mario Rozić ističe da podržava zaključak da se posebnim zakonom reguliše status zaposlenika na lokalnom nivou.

Nakon diskusije, usvojeni su zaključci kako slijedi:

- Predsjedništvo Saveza je jednoglasno usvojilo Nacrt Strategije obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine za period 2016. – 2020. godina;
- Predsjedništvo Saveza je jednoglasno usvojilo zaključak da Savez općina i gradova Federacije BiH i Agencija za državnu službu Federacije BiH zajednički upute Strategiju obuke za uposlenike i izabrane zvaničnike u jedinicama lokalne samouprave u Federaciji Bosne i Hercegovine za period 2016. – 2020. godina Vladi Federacije BiH na usvajanje;
- Predsjedništvo Saveza je jednoglasno usvojilo zaključak da nadležna komisija Saveza uporedi Prijedlog zakona o izmjenama i dopunama Zakona o državnoj službi u Federaciji Bosne i Hercegovine i Nacrt zakona o zaposlenicima u organima jedinica lokalne samouprave u Federaciji Bosne i Hercegovine;
- Predsjedništvo Saveza je jednoglasno usvojilo zaključak da Savez uputi Nacrt zakona o zaposlenicima u organima jedinica lokalne samouprave u Federaciji Bosne i Hercegovine Vladi Federacije BiH radi izjašnjenja i stavljanja u parlamentarnu proceduru.

c) Informacija o realizovanim aktivnostima Saveza u okviru Projekta „Jačanje lokalne demokratije“ – LOD IV

Selma Fišek je ukratko informisala o aktivnostima realizovanim u okviru Projekta „Jačanje lokalne demokratije“ – LOD IV.

Predsjedništvo Saveza je primilo k znanju informaciju o realizovanim aktivnostima Saveza u okviru Projekta „Jačanje lokalne demokratije“ – LOD IV.

d) Informacija o realizovanim aktivnostima Saveza u okviru Projekta „Integrirani lokalni razvoj“ – ILDP

Zlata Turkić je ukratko informisala o aktivnostima Saveza u sklopu Projekta „Integrirani lokalni razvoj“ – ILDP

Predsjedništvo Saveza je primilo k znanju informaciju o realizovanim aktivnostima Saveza u okviru Projekta „Integrirani lokalni razvoj“ – ILDP.

4. Informacije:

a) Odgovor Kantonalnog suda u Sarajevu na Urgenciju Saveza općina i gradova Federacije BiH po osnovu tužbe Saveza protiv Federacije Bosne i Hercegovine u vezi sa otplatom kreditnih sredstava prema Međunarodnom monetarnom fondu

Vesna Travljanin je izvijestila da je Savezu od strane Kantonalnog suda u Sarajevu dostavljen odgovor na Urgenciju Saveza za prioriteto uzimanje u rad predmeta i rješavanje po žalbi u postupku po tužbi Saveza protiv Federacije Bosne i Hercegovine, u kojem je navedeno da je odobreno da se predmet tretira kao hitan.

Predsjedništvo Saveza je primilo k znanju ovu Informaciju.

b) Informacija o zakonodavnim aktivnostima Saveza

U okviru ove tačke je naglašeno da se već raspravljalo o problematici vezanoj za Zakon o šumama.

Zlata Turkić je informisala Predsjedništvo da je Radna grupa za izradu Zakonu o koncesijama održala niz sastanaka vezanih za izradu Nacrta zakona o koncesijama na kojima je aktivno sudjelovao i predstavnik Saveza. Dalje je navela da su u toku aktivnosti na izradi novog Zakona o građevinskom zemljištu s ciljem njegovog usaglašavanja sa Zakonom o stvarnim pravima.

Predsjedništvo Saveza je primilo k znanju ove informacije.

c) Konferencija predsjedavajućih i sekretara općinskih/gradskih vijeća

Predsjedništvo Saveza je primilo k znanju informaciju o održanoj Konferenciji predsjedavajućih i sekretara općinskih/gradskih vijeća.

5. Tekuća pitanja

a) Odgovor Federalnog ministarstva pravde na Inicijativu Saveza za donošenje Zakona o komunalnim djelatnostima u Federaciji Bosne i Hercegovine

Selma Fišek je navela da je Federalno ministarstvo pravde Savezu dostavilo odgovor na Inicijativu Saveza za donošenje Zakona o komunalnim djelatnostima u Federaciji Bosne i Hercegovine u kojem je navedeno da donošenje propisa iz ove oblasti u Federaciji BiH spada u nadležnost kantona, gradova i općina.

Nakon što je konstatovano da su sve tačke dnevnog reda iscrpljene, Edin Smajić je zatvorio Desetu sjednicu Predsjedništva Saveza u 13. sati i 50 minuta.

Zapisnik sačinila:
Selma Fišek, s.r.
Skupštine Saveza

Predsjednik Predsjedništva

za Ivo Jerkić
Edin Smajić, s.r.